

Panalangin ng mga Kristiyano sa Maghapon
LITURGY OF THE HOURS

PANALANGIN SA TAKIPSILIM

Ika-22 ng Disyembre, 2025

{ Ika-4 Lunes sa Panahon ng mga Adbiyento }



Tumayo at gawin ang tanda ng krus

O Diyos, halina at ako'y tulungan.

— O Panginoon, magmadali ka sa iyong pagdamay.

Papuri sa Ama, at sa Anak, at sa Espiritu Santo.

— Kapara noong una, ngayon at magpasawalang hanggan.
Amen.

AWIT

Ngayon at naglaho na, liwanag ng umaga,
Pumapasok ang dilim, gabi ay narito na,
Sa paglubog ng araw, pag-asa'y nakikita
Na may buwang-liwayway, at may dulot na saya.

Ang araw na sisikat, sa pagdating ng bukas,
Tulad ng Poong Hesus, busilak ang liwanag,
Sa gabi ng pagpanaw, ang kalangitang hanap,
Nawa'y mapasaatin, buhay na walang wakas.

Kagaya noong una, patuloy ang paglikha,
Lahat ay binabago, kay Kristo'y pinagpala,
Kadilima'y lilipas, makikita ng madla,
Isang Diyos-Ama, Anak, at Espiritung Dakila.

Umupo o tumayo

MGA ANTIPONA AT SALMO

Antipona 1

Ang Panginoon, na namumuno sa lahat ng hari sa lupa, ay darating;
pinagpala silang handang pumunta upang siya'y salubungin.

Salmo 136

(Awit ng Pagicabuhay)

I

O pasalamatan ang Diyos na PANGINOON pagkat s'ya'y mabuti,
Ang kanyang pag-ibig ay pangwalang-hanggan at mananatili.
Pinakadakilang Diyos ng mga diyos ay pasalamatan,
Ang pag-ibig niya ay mananatili at pangwalang-hanggan.
Makapangyarihang higit kaninuman itong PANGINOON,

Ang kanyang pag-ibig ay mamamalaging panghabang-panahon.

Dakilang himala at kababalaghan,

Tanging siya lamang ang makagagawa,

Pagkat ang pag-ibig niya'y walang hanggan.

Sa kanyang talino ay kanyang ginawa yaong mga langit,

Pagkat walang hanggan at hindi kukupas ang kanyang pag-ibig.

Nilikha ang lupa at pati ang tubig nitong kalaliman,

Ang pag-ibig niya ay mananatili at pangwalang-hanggan.

Siya ang lumikha, siya ang gumawa, ng araw at buwan,

Ang pag-ibig niya ay di kumukupas at pangwalanghanggan.

Nilikha ang araw upang s'yang tumanglaw sa buong maghapon,

Ang kanyang pag-ibig ay mananatiling panghabangpanahon.

Ang buwa't bituin ay kanyang nilikhang pananglaw kung gabi,

Ang kanyang pag-ibig ay pangwalang-hanggan at mananatili.

Papuri sa Ama, at sa Anak, at sa Espiritu Santo,

Kapara noong una, ngayon at magpasawalang hanggan. Amen.

Antipona

Ang Panginoon, na namumuno sa lahat ng hari sa lupa, ay darating; pinagpala silang handang pumunta upang siya'y salubungin.

Antipona 2

Ang Panginoon ay awitan ng isang bagong awit; ipahayag ang kanyang kapurihan hanggang sa dulo ng daigdig.

II

Ang mga panganay ng mga Egipcio ay kanyang pinatay,

Ang kanyang pag-ibig ay di kumukupas at pangwalang-hanggan.

Ang nasa Egiptong mga Israelita, siya ang naglabas,

Ang kanyang pag-ibig ay mananatili at hindi kukupas.

Ang ginamit niya'y mga kamay niyang makapangyarihan,

Ginawa n'ya ito pagkat ang pag-ibig niya'y walang hanggan.

Ang Dagat ng Tambo ay kanyang hinati, at natuyong tunay,

Ang kanyang pag-ibig ay hindi kukupas at pangwalang-hanggan.

Ang pinili niyang bayan ng Israel ay doon dumaan,

Ang pag-ibig niya ay hindi kukupas at pangwalang-hanggan.

Ang hari't Faraon at ang hukbo nito ay kanyang nilunod,

Ang pag-ibig niya ay pangwalang-hanggan, hindi matatapos.

Nang mailabas na'y siya ang kasama habang nasa ilang,
Ang kanyang pag-ibig ay mananatili at pangwalang-hanggan.
Pinagpapatay n'ya yaong mga haring may kapangyarihan,
Ang pag-ibig niya ay mananatili at pangwalang-hanggan.
Maging mga haring bantog noong una ay kanyang pinatay,
Ang kanyang pag-ibig ay hindi kukupas at pangwalang-hanggan.

Siya ang pumatay sa haring Amorreo, ang haring si Sehon,
Ang kanyang pag-ibig ay mananatili sa habang panahon.
S'ya rin ang pumatay sa bantog na si Og, ang hari ng Basan,
Ang kanyang pag-ibig ay hindi kukupas at pangwalang-hanggan.

Ang lupain nila'y ipinamahagi sa kanyang hinirang,
Ang pag-ibig ng Diyos ay mananatili at pangwalang-hanggan.
Ipinamahagi niya sa Israel, kanyang mga lingkod,
Hindi kumukupas at mananatili ang pag-ibig ng Diyos.
Nang tayo'y malupig ng mga kaaway, di niya nilimot,
Ang kanyang pag-ibig ay mananatili at di matatapos.

Nang tayo'y masakop ng mga kaaway, pinalaya tayo,
Ang kanyang pag-ibig ay mananatili, hindi magbabago.
Lahat ng pagkain ng tao at hayop, siya'ng nagbibigay,
Ang kanyang pag-ibig ay hindi kukupas at pangwalang-hanggan.
Ang Diyos nitong langit ay dapat purihin at pasalamat,an,
Ang pag-ibig niya'y hindi magbabago at pangwalang-hanggan!

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Ang Panginoon ay awitan ng isang bagong awit; ipahayag ang
kanyang kapurihan hanggang sa dulo ng daigdig.

Antipona 3

Kapag ang Anak ng Tao ay dumating sa daigdig na ito, mayroon
kaya siyang matagpuang sapat na pananalig sa puso ng mga tao?

Awit: Efeso 1:3-10

Magpasalamat tayo sa Diyos

At Ama ng ating PANGINOONG Hesukristo!
Pinagkalooban niya tayo
Ng lahat ng pagpapalang espirituwal
Dahil sa ating pakikipag-isa kay Kristo.

At sa atin ngang pakikipag-isang ito;
Hinirang na niya tayo bago pa nilikha ang sanlibutan
Upang maging banal at walang kapintasan sa harapan niya.

Dahil sa pag-ibig ng Diyos,
Tayo'y kanyang itinalaga upang maging mga anak niya
Sa pamamagitan ni Hesukristo.

Iyan ang kanyang layunin at kalooban.
Purihin natin siya
Dahil sa kanyang kahanga-hangang pagkalinga sa atin
Sa pamamagitan ng kanyang minamahal na Anak!

Tinubos tayo ni Kristo sa pamamagitan ng kanyang kamatayan
At sa gayo'y pinatawad na ang ating mga kasalanan.
Gayon kadakila ang pag-ibig na ipinadama niya sa atin.

Binigyan niya tayo ng karunungan at kabatiran
Upang lubos nating maunawaan
Ang kanyang lihim na panukala na isasakatuparan
Sa pamamagitan ni Kristo pagdating ng takdang panahon.

Ang panukalang ito ay pag-isahin kay Kristo
Ang lahat ng nasa langit at nasa lupa.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Kapag ang Anak ng Tao ay dumating sa daigdig na ito, mayroon
kaya siyang matagpuang sapat na pananalig sa puso ng mga tao?

Umupo

PAGBASA NG SALITA NG DIYOS

Filipos 3:20b-21

Hinihintay nating may pananabik ang PANGINOONG

Hesukristo, ang ating Tagapagligtas. Pagdating ng araw na yaon, babaguhin niya ang ating katawang-lupa at gagawing maluwalhati, tulad ng kanyang katawan, sa pamamagitan ng kapangyarihang ginamit niya sa pagpapasuko sa lahat ng bagay

Tugunan

Halina't kami'y palayain, Panginoong Diyos na makapangyarihan.

- Halina't kami'y palayain, Panginoong Diyos na makapangyarihan.

Pasinagin sa amin ang iyong mukha at kami'y maliligtas,

- Panginoong Diyos na makapangyarihan.

Papuri sa Ama, at sa Anak, at sa Espiritu Santo,

- Halina't kami'y palayain, Panginoong Diyos na makapangyarihan.

Tumayo

PAPURING AWIT NI MARIA

Antipona

Dinala ng anghel ng Panginoon ang mensahe ng Diyos kay Maria, at siya'y naglihi sa pamamagitan ng Espiritu Santo, aleluya.

Lukas 1:46-56

Gumawa tanda ng krus

Ang puso ko'y nagpupuri sa Panginoon,
At nagagalak ang aking espiritu dahil sa Diyos na aking tagapagligtas.

Sapagka't nilingap niya ang kanyang abang lingkod!

At mula ngayon, ako'y tatawaging mapalad ng lahat ng salinlahi,
Dahil sa mga dakilang bagay na ginawa sa akin ng
Makapangyarihan —
Banal ang kanyang pangalan!

Kinahahabagan niya ang mga may takot sa kanya,
Sa lahat ng sali't saling lahi.
Ipinakita niya ang lakas ng kanyang mga bisig,
Pinangalat niya ang mga palalo ang isipan.

Ibinagsak niya ang mga hari mula sa kanilang trono,
At itinaas ang mga nasa abang kalagayan.

Binusog niya ng mabubuting bagay ang mga nagugutom,
At pinalayas niyang wala ni anuman ang mayayaman.

Tinulungan niya ang kanyang bayang Istaël,
Bilang pagtupad sa pangako niya saating mga magulang,
Kay Abraham at sa kanyang lahi, magpakailanman!

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Dinala ng anghel ng Panginoon ang mensahe ng Diyos kay Maria,
at siya'y naglihi sa pamamagitan ng Espiritu Santo, aleluya.

PANGKALAHATANG PANALANGIN

Magmakaawa tayo sa Panginoon na darating upang sumaatin ang kaligtasan:

— Halina, Panginoon, at kami'y iligtas!

Panginoong Hesukristo, aming Diyos at Tagapagligtas ng lahat,
magmadali ka kami'y iligtas.

— Halina, Panginoon, at kami'y iligtas!

Panginoon, sa pamamagitan ng iyong pagdating sa sanlibutan,
palayain mo kami sa sala ng sandaigdigan.

— Halina, Panginoon, at kami'y iligtas!

Nagmula ka sa Ama,
ipakita sa amin ang daan patungo sa kanya.

— Halina, Panginoon, at kami'y iligtas!

Ipinaglihi ka sa pamamagitan ng Espiritu Santo,
panibaguin nawa sa aming mga puso ang Banal na Espiritu sa
pamamagitan ng salita mo.

— Halina, Panginoon, at kami'y iligtas!

Naging tao ka mula kay Mariang Birheng Mahal,

palayain ang aming katawan sa tiyak na pagpanaw.

— Halina, Panginoon, at kami’y iligtas!

Panginoon, kalingain mo ang lahat ng tao,
na sa simula’t simula’y nagtiwala sa iyo.

— Halina, Panginoon, at kami’y iligtas!

Ama Namin

Ama namin, sumasalangit Ka
Sambahin ang ngalan Mo
Mapasaamin ang kaharian Mo
Sundin ang loob Mo
Dito sa lupa, para nang sa langit.
Bigyan Mo kami ngayon ng aming kakanin sa araw araw.
At patawarin Mo kami sa aming mga sala,
Para nang pagpapatawad namin
Sa mga nagkakasala sa amin.
At huwag Mo kaming ipahintulot sa tukso,
At iadya Mo kami sa lahat ng masama.
Sapagkat Iyo ang kaharian, at kapangyarihan,
At ang kadakilaan, magpakailanman.

PANGWAKAS NA PANALANGIN

Amang makapangyarihan,
tulungan mo kaming makapaghanda
sa pagdating ni Kristong iyong Anak.
Nawa’y maratnan niya kaming naghihintay,
na nananabik at masayang nagdarasal,
sa pamamagitan ni Hesukristo,
kasama ng Espiritu Santo magpasawalang hanggan.

— Amen.

Paghayo

Pagpalain nawa tayo ng panginoon, iligtas tayo mula sa lahat ng
kasamaan at akayin tayo sa buhay na walang hanggan.

— Amen.

PANALANGIN NG MGA KRISTIYANO SA MAGHAPON

Ang mga tekstong biblikal at mga Papuring Awit na ginamit ay halaw mula sa MAGANDANG BALITA BIBLIA. Karapatang-sipi @ 1973, Philippine Bible Society, U.N. Ave., Manila.

Ang mga titik ng mga Awit at ang mga disenyong pansining ay likha ni Padre Mar DJ Arenas.

Karapatang-sipi @ 1994, LUPON REHIYONAL UKOL SA TAGALOG SA LITURHIYA.

Archdiocesan Liturgical Commission, Manila



mobile prayers



UNITED STATES OF AMERICA
www.ebreviary.com